



## Communicaziun a las medias

### **19avel Top Pop Rumantsch: La melodia dal mument**

Cuira, ils 17 da zercladur 2009 – **Il protagonist dal 19avel Top Pop Rumantsch ha num Theo Demund; el è quasi in «veteran noviz».**

Las chanzuns da Theo Demund fan in grond artg. Quel cumenza en l'euforia musicala dals zunt fritgaivels onns '80 si en la Cadi – Theo era alura giuvenischem rockadur-batterist. Ed el tanscha enfin tar las fermas emoziuns dad in ambient psychiatric – ses post da lavur actual. Cun auters plects: sias chanzuns cumbineschan la poesia persunala, misteriusa cun ils tuns che cutizzan las ureglias. Quai è in dals prads preferids da la musica moderna, in champ da frajas bunamain. Ed in cas cler per il Top Pop dal Radio Rumantsch. La chanzun tschernida porta il titel «Adina uss, mai enzacu». In gieu cun plects cuntraris.

Mo per dir ch'i saja magari meglier a giudair il mument, empè da sa scumbigliar en istorgias passadas u futuras. En ina da las lingias clav di il simpatic chantatur era: «Enzacu stos perdunar, actas vedras manizzar». La melodia, quella dentant n'emblid'ins betg uschè spert.

Theo Demund, annada 1970, è creschì si a Darvella sper Trun. El viva oz a Panaduz e lavura sco assistider psychiatric. En sia giuventetgna ha el sunà batteria tar la gruppa sursilvana Ba-Rock. Pli tard ha el scuvert la ghitarra ed il scharm dal chantatur. Ensemen cun Olivier Pernet e Rolf Caflisch furma el oz il trio Danunder.

#### ADINA USS, MAI ENZACU

Text e musica: Theo Demund

Producziun: Manfred Zazzi

Ghitarra acustica e chant: Theo Demund

Ghitarra electrica: Jean-Pierre Van Dach

Bass: Dave Maeder

Tastas: Olivier Pernet

Batteria: Rolf Caflisch

Mix: Manfred Zazzi

## ADINA USS, MAI ENZACU

Il vargau ha formau  
Il passau ha dictau  
Las leschas actualas.  
Il present ei in vent  
Che tucca il mument,  
Lai sbatter cun las alas.

Il futur ha buc substanza  
Il futur ei ina stanza  
Senz`esch e senza savas.  
Gl`avegnir buc existent  
Distaccaus dil temps present,  
Energias sfarlatadas

Adina uss, mai enzacu  
Saiel buca nua che setschentel  
Adina uss, mai enzacu  
Saiel buc e buc damondas tschentel

Mo enzacu stos perdunar  
Flommas veglias schar stizzar  
Per l`atgna pasch anflar.  
Enzacu stos perdunar  
Actas vedras manizzar  
E sin il vent tedlar.

Adina uss, mai enzacu  
Saiel buca nua che setschentel  
Adina uss, mai enzacu  
Saiel buc e buc damondas tschentel

Sche mon lu mon  
Sche stun lu stun

Adina uss, mai enzacu  
Saiel buca nua che setschentel  
Adina uss, mai enzacu  
Saiel buc e buc damondas tschentel

(Top Pop Rumantsch è in label per purschidas innovativas ed unicas en il program da musica dal Radio Rumantsch. Las emprimas dudesch chanzuns da la retscha èn cumparidas sin il disc cumpact «Top Pop Rumantsch, Vol. I, 2005-2007», da retrair tar: Radio Rumantsch, Via Masans 2, 7002 Cuir, 081 255 75 75 u: [www.rtr.ch](http://www.rtr.ch))

Per ulteriuras infurmaziuns:

Jachen Prevost, manader redacziun da musica RR, tel. 081 255 75 75,  
jachen.prevost@rtr.ch